

皇明經世文編

皇明經世文編卷之一百二十五

陳子龍臥子 徐孚遠闇公

華亭

選輯

宋徵璧尚木 彭 賓燕又

張 密子退參閱

羅圭峯集

疏

羅 玘

為蚤定宗社大計以絕窺覷事疏

宗社大計

垂 崇始上 宗社

大計

疏 言 施 而 謂 恐 此 第 二 疏 也

疏 也

疏 也

疏 也

臣於去年四月具本差義男齋 奏內開向者賊瑾

謀遂 榮王、當時顧命大臣不能殛助 陛下諍留

榮王，致使陛下肘腋之間，無一血屬之親，足以召亂彰彰，有前驗也。故舉宋司馬光、婁亮之故事，以續天聽，兼備責諸臣蕩無廉恥、阿附賊瑾之狀，而又發其後日乘時觀望、不忠之謀，冀以感動宸衷。即賜施行，以慰海宇臣民之望，以銷姦雄睥睨之心。然後螽斯衍慶，麟趾肇祥，禮遣歸藩，爰正主鬯。臣雖謫死，固其分也。是後寂然不聞示諭，臣料必是後宮儲祥，將次彌月。臣之私喜，旦夕望之。及今踰年，更無影響，徒聞大盜並興，遍布天下，連數十城，所過

如洗運河兩岸。焚劫殆空。前日縛殺方面。明日射死將官。近於楊村。剖剝叅將王杲。夫楊村去京城幾何。而眼空如此。臣謂國本不定。姦雄睥睨。今何如哉。前月二十三日。湖廣陽邏地面。傳來流賊執殺右副都御史馬炳然。臣初疑似之間。以爲副都御史。九卿之貳也。且非受命征勦之。不過遇之而已。而輒殺之。則九卿之長。遇之必殺也。九卿之長。敢殺之。則公侯駙馬。伯遇之必殺也。是尚知有朝廷威令哉。而豈專謂其必殺而不與。朝廷左右。尚爲有人乎。而臣亦備員九卿之貳。亦

之俱生也

在賊必殺之中。誓當不與此賊俱生。賊生臣死。賊死
臣生也。亦痛夫。國本之未定。而睥睨之萌。漸不可
遏。已至此也。然尚斷然不信傳來之言。忽於今月十
三日申刻。迎接炳然之吏王庭昌回報云。親斂炳然
之屍。面劈一刀而去。其鼻身中兩箭。而傷其肋。臣即
跌仆在地。口鼻流血。昏暈沉寔。如同氣絕。臣久不以
妻子自隨。止憑一二小童。扶摩灌飲。至曉畧蘇。目今
氣息奄奄。死在旦夕。尚恐賊窮生計。魚游釜中。火燃
水沸。且喘息須臾之命。百方搜索。或至擁如盆子者。

一二人焉。馳騫中原。誘聚不逞。百姓愚頑。未明逆順。諸將狐疑。益見逗遛。事機一變。成敗分焉。自是二三大臣。雖欲竊假包荒養高之名。以庇其私門桃李之黨。如數十年前未可也。而陛下尚欲與數十近習。爲講武之舉。寧有暇哉。伏望陛下。幹乾轉坤。少垂

睿覽。立召皇親公侯駙馬伯府部院寺大臣翰林院科道多官。考司馬光范鎮韓琦文彥博呂誨包拯趙抃諸臣之議。棄短取長。酌古準今。藏鋒斂鐔。隨事據理。假代九廟之勤。兼兩宮之奉侍體。祖宗之

意而不懸定順 昭穆之意而無即真專候 椒房
 之芳快觀 前星之耀納庶衆於不識不知之天禡
 姦雄於如雷如霆之下則臣即誅歿猶生之年亦甚
 樂也臣不勝憤激屏營之至。

序

送都閩文君之江西任序

江西都閩

江西都指揮使司統衛四所十有一衛以南昌名者
 二治會麻南昌地也以贛名治贛以袁名治袁所之
 以地名者亦治其地凡其所在大抵皆要害也贛暨

南安背負大庾而信豐會昌犬牙入于南粵之與區
素吉則湖湘之脇洞巒寶口張噬于安福之鎖永新
則先嘗其齧焉鉛山匪閩之北門也撫建阨其西牖
與贛犄角之吳越以饒信爲唇齒而江淮湖漢舟師
必爭之地者南昌也由是推之古者有作類爲民防
百數十年良亦有賴非徒設也今則異於是矣春耕
闢粵者彼曰良民也秋入贛建翼然而虎巨寇也臨
瑞頻年白晝飛刃于譙門且曰吾某也吾某也而守
臣懷印踰垣爲得策揚聲撫按遠壘近郊遊羣之四

出也。迎犒者室空，遁竄者屋燎，而管之所謂爲民防者，果安在哉？將時與古初異邪？而尚爾設何也？抑主帥者尸其位而掣肘于其闕也邪？胡不易置之而務得其人乎？國是旣定，於是不愛尊碩之臣，俯從輯綏，未數月也。又以文君大章爲其都指揮同知，往踐其位。所謂主帥者，君魁傑人也。以武科舉，聲言琅然。嘗以京營贊畫協副涼州左叅將守莊浪，入主京營。而獨當一面折衝，乃其任也。亦輿論也。顧抑而就，是豈吾君與吾相不知君哉？時有緩急，事有經權，出

宿將以壯民防救時也。寇殄民寧。克回古初。則君之促裝時矣。錦衣魯侯景章。與予均江西人。壯君之行。而冀其遄歸也。別之以言。且以爲期云。

送錦衣張侯出邏序

錦衣出邏

歲聿云莫。燕趙之間。惡子弟。食飲博奕。費且盡。思爲寇偷益急。每同朔風塵起。躍馬突出周道上。矢聲搜然。雖有賁育千夫。而手龜足瘵。飢虛困悴之餘。亦不免戰掉失色。伏而獻囊。免患於瞬息間。誠畏之也。况南人素綿。道遠而疲。三尺童子。可以制之。其所攜者。

固其物也。亦何擇於公私哉。當是時。懸人之命於手。壯哉翼虎也。而國門南出三途。視他域尤多。蓋河水不舟。今天子貢道出焉。故令甲三途。歲遣錦衣支帥三人。握符提衛士。分出以邏。其出必以子月望日。又出三御史並臨之。凡兵民之司。皆受檄指麾從事。期以靖寇寧民。足國阜財而已。今年中途。屬張侯養直。侯余友也。少爲武學生。戰藝場不如志。而抑就右階。時尚爲百戶也。嘗屢戰建州諸胡。得今官。廉毅爲其大帥所知。以其名請。乃有是命。非常數也。今日建

纛出郊。乘虎皮韞弓。韞魚服僕姑。在冰衛士。屏息俛首。不敢唾嚏。不敢仰視。就而子趨離而鵠立。整若斧。兀若尸。人皆壯侯能戢士。謂寇固在其掌中。余獨知其建州之戰。夜半斬虜首獻軍門。如殺狐鼠耳。今茲禦人之寇。固實捷且趨也。亦豈敢望於虜人哉。其出沒騰蹂。必輕騎遊韉。無所止舍。亦豈旃車窮廬區脫。而悉衆以爲重乎。以予觀之。盖出穿窬胠篋之徒。一籌耳。使道上之旅。去其畏心。并力支撐。而生歿以之。則形格勢禁。彼固無能爲也。尚勞天子爪士之出。

寫得有。

哉。戢士亦其末事。別筵有詩。余總其意爲之序。

送憲副張君之任陝西序

陝西監司

地之涯爲邊。衣之齊而祿也。亦謂之邊。凡器物之旁肉通爲之邊。然則邊之云者。中國之盡際。外此則爲蠻爲戎爲羗爲狄。先王亦不得而兼治之。蓋越邊而求以爲衣。求以爲器物。不可也。然物之壞也。皆自其邊始。故先王於此尤慎之。而重爲之防。非憂邊之民。不足以抗之。爲之憂也。憂夫無以使邊之民抗之。有壞而入內之道焉。爲之憂也。邊之民其生而風土之

鍾長而氣習之漸。大約與之亦不相遠。其山海與之相涉降而浮游也。其飲噉騎射漁獵與之相錯而使習也。父華而子夷也。父夷而子華也。或其身之迭爲華夷也。皆不可得而準也。而或者持吾關吾堡塞在猶謂吾中國如完衣完器物然其亦不思之甚矣。於乎。邊圉之寄。可視以爲何如。而獨付之武人。况儉人之與庸人乎。正速其壞而已。西北之邊。古已不與東南並。而西於今尤爲多警。洮岷亦西之一面。生蕃西羌之所窺覲。而此亦伏罟孔深。天子以爲空得憲

臣之有威望者。節制之。以銷之於未萌。於是以監察御史張君。爲陝西按察副使。往即其任。君前奉詔。按甘肅邊臣諸不職者。朝議服以爲能。蓋肅之距甘也。五百里。是爲瓜州。瓜之西。古玉門關也。而中國之地。至是亦盡矣。計其道里之。虺蟠蚓屈於河山之間。腰腹脊脇。要皆虜也。其穿而入也。幾隧。其入而薄也。幾城。其變也。孰激之。其來也。孰導之。敗孰爲之。殿罪孰爲之。魁君在道時。顧瞻躊躇。固有定筭。而後諸鬻歸者。無所動其喙。不得盡其辭焉。稱曰。能。空也。洮

喂尤近於甘。羗之強不及於諸虜。偏裨將非大將。尊重臣。而副使之得久於其任。又非御史暫臨比也。

天子之所以用君。烏得無情乎。或謂君端公之老者也。寔在朝廷預政事。其非寔。是之謂不知務。凡器物於其芴肉之邊。倍厚之。然後可保其恒完而不壞。用君於邊固以厚邊也。庸非所以重君乎。此非予之言也。其寮言之於予者也。且使書之爲序。以爲君行贈。

送閩帥黃君福建備倭序

備倭

倭奴夷亦曰日本東海外之夷也。謂之奴，奴之也。奴必有主，吾中國是已。天下之賤辱且勞者，至于奴亦極矣。然其心亦未必甘而安爲之也。其鬱鬱之忿蓄於中，而或乘之以黠，鼓之以暴，則門屏之間將有易位之變。伏焉而莫覺者，而况擁君人之號，襲世傳之序，聚落之人，兵軍之富，器械之工巧，而又遠在漲海荒服之外。吾奴之而已。彼豈俛焉直受如茲倭奴者。吾雖爲主，而欲偃然不加之意，求以無患得乎。又况安南朝鮮均夷也，而朝貢時至。正朔所加。封册

所臨齒諸親藩而倭亦以文字爲國獨蒙棄斥無
辭以別夫蝸殼蟻封之夷其情之痛苦不獨蓄忿之
奴而已也夫奴之忿不忿一家之利害而已矣今倭
之界與明越諸州相值東抵遼南盡千閩廣延袤萬
里不啻皆吾地吾赤子也而付諸蓄忿之夷朝夕睚
眦以徂伺之其忍乎千里之間千夫之所不啻必萬
夫之衛不啻必閩帥以臨之勢必至于此乃得策也
署閩帥黃君今年四月以簡命當詣福建所隸衛
五所十水寨五戰艦千艘水軍十萬偏裨之將數百

人君至將將將軍軍登艦弓引滿劔露芒鳴鼙如雷
軍于島嶼之汶直奴視倭奴如以肉臨虎口若然真
備倭之賢將也君先世土人土人今亦有利器上人
宦于朝者皆觀君此舉借予言告之

賀句君奉

詔提督四衛管事序

提督
四衛

國家制兵以府自京師以達於天下又達於四遐之
邊羈縻之域凡赤籙者皆伍以聯什什以隸百百以
隸千千有所千以隸萬萬有衛合諸衛則又有都帥
以總之以分隸于府爲府五又皆制于兵部乃兵部

有綜理發召之專焉。府帥有握兵之重。無不制之兵也。然禁兵不與焉。禁兵則惟綜理於兵部。稽其盈耗。而乘除之。發召無所敢與。錦衣亦禁兵也。其帥且與府帥抗。伺察其幾微。府帥且俯仰之。其下偏裨徹侯。有不相名者。錦衣次而爲旗手。府軍金吾羽林。又次而爲虎賁騰驤武驤。其帥雖不敢視錦衣。以抗府帥。然皆同禁兵。非其屬也。禁兵宿衛。宮門扈翊。警蹕。天子御衙。執戈戟以侍陞。凡大朝會。設鹵簿以嚴。國容出則夾。乘輿以備非常。古者去其

淫息奇袤而教之道藝。周公以綴衣虎賁。次諸常伯。常任。準人以立政。蓋爲王爪牙腹心之近。雖名爲兵。豈真特一勇之夫而已哉。况同衛於京也。一爲府隸。其官也。望軍門而戰慄。願指氣使於戲下。如弄兒然。雖金紫不免也。禁兵固攘壁也。歲朝一入。大庭燎烟。羃顧瞻未周。已放仗矣。禁兵固日以爲家也。而又密聞祕見。蓋山林耆宿之儒。得於殘編斷簡。有未敢以爲的然者。其兵如此。居其上而爲官。可知已。况居其官之上而爲之節制者乎。騰驤四衛。舊有提督事。

官。所謂節制者。會當代。詔以代者。句君集也。錦衣
張君養直。雅與善。而求予說爲君贈。予亦不知君也。
知禁兵之重。其官重。其節制尤重也。今天子明見
萬里。耳目所及之重者。豈輕以畀人。君慎勉哉。

皇明經世文編卷之終

皇明經世文編卷之一百二十六

陳子龍臥子 徐孚遠闇公

華亭

宋存標子建 宋徵璧尚木

選輯

馮瑞儀羽公叅閱

何文簡公集

書

何孟春

上大司馬相公書

北虜

五月望日職方司觀政進士何孟春、惶懼再拜書上

大司馬相公執事、北聞北虜有書要三千人入貢、人

貢之名可嘉。而所以求貢之詞甚逆。詔下文武羣議。下官病臥逆旅。不審廟堂言慮何似。既乃有傳朝報者云。得旨聽虜貢三分裁二。此豈非主上所採于羣議者歟。其聽之也。豈非以遠人當柔而懷之。而絕其來王之心。恐構邊釁。故歟。夷狄貪婪無厭。所貢莫裨朝廷之毫芒。而錫賚適足以傷國用。來彌多。費彌廣。故不容不裁之也。抑愚于此復有慮焉。國用當恤。國勢尤不可不重也。虜書稱與書而不表。與我抗也。稱我以南朝。是將北等我也。而我忍之。可遽令人貢。而

無一辭以責其傲嫚之舉。平虜以三千人請。而我遂許其一千一百人。使虜後復以六千人請。將許其三千人乎。且彼書已云。減我一人。卽三千人俱不來。是有挾也。今我許其貢而裁其三之二。虜如不來。其可無重備乎。而來亦有以覘我之虛弱。而虜且得氣矣。我國勢失重于虜。而可乎哉。愚虜今匆降勅虜王。而督責之。舉大威福。大利害。而曉之。謂虜必革心謝罪。尅受入貢。庶幾乎虜有畏懼。而不敢覬覦于將來也。嗟乎。此計甚明。老成裁處。迺不然者。誠慮一時士馬。

不能精克萬分一虜出叵測。邊彙將難支耳。愚以爲示虜以強。猶足消其桀驁。示虜以弱。而使虜得氣。國勢失所重。其生虜覬覦之漸。將來有不可言者。其所費又不啻三千人而止也。赫赫我明。盡覆載而宰之。軍政馬政。樞機周密。承平百二十餘年。未嘗耗千征討。而不能精克。猶不免肉食之慮。何謂也。以愚所聞。士馬集京師者。之不精克。其弊久矣。法久易壞。弊隨隳生。在執事明鑑照之。知其所生之端。革而振之。不難也。士之不能精克。占役者多。影蔽者衆也。馬之不

能精克。監牧者不覈其實。受牧者之不適其宜也。司馬寔總士馬之任。而執事任之。品式具存。額類可考也。而又舉得其人以自輔。因已成之跡而通融之。何慮乎不能精克之有。葦爾醜種。敢畜不恭而暴戾乎。肆正當長纓。逞繫其頸。而致之闕下耳。雖然。愚有不。敢以易談者。所慮不在士馬。而在將材也。執事其視武將中。有能臨機制變者幾人。有能造謀畫策者幾人。有能知守正出奇。慷慨有大節。能不愛死。得人之死力者幾人。而皆未之有也。是則深可愛矣。儒者不

言兵。儒者不可以不知兵也。聖世不用兵。未有聖世而不爲兵備也。北虜來書無婉詞。有所挾矣。執事欲備兵于此時。其不擇將材于知兵者而預養之乎。執事試求其人焉。未察豈無奇士。春惶懼再拜。

寄劉黃門書

礦場

所論礦場一事。先之所謂閉者。初未嘗明開而獲閉。後之所謂開而請閉者。隱下新開而適以成專督者之利。今日請閉。有所謂新開者。是要數出彼舊所開地方。而不爲之隱。非新開在今日也。昔日礦場。朝廷

有開之名。鎮守有開之利。今日礦場數出。所開地方以見礦夫乾認之苦。口糧虛費之故。爾然得該科叅出。該部執奏得免礦夫口糧。所以除蠹弊而寬地方者。蓋不細矣。今與專督理者會議。水火決不相入。區區自力主封閉爲說。固不待言也。因便及之。

寄諸閣老并喬冢宰書

鎮守

立祠祀以表忠義。勸勲賢。開例禁以興民利。足國用。申明律例。陳言遜務等事。亦不敢默。其詳具揭帖內。伏乞仁明鑒此。區區公勤。庶塞咎責。向奏爲裁革內。

外冗員守臣復設府治撫安夷民以消地方大變事
乃此地臨夷切要而最大者際有今日千載一時春
言得賴執事與戶兵二部商確勇斷施行其貽陰德
于邊氓不細春去此無恨矣本想該部已覆立府必
須亟會鎮守內外官詔旨至已久而彼猶回翔未行
正由撫按乞要裁革本猶未至之故彼中鄉官如張
亞卿南園輩目擊正德年中之苦爲此後子孫計尤
切懸懸當道處之決有次第但願及早行下避荒邊
慮恐又如前要會鎮守查勘則彼有力者得以牽制

改圖、府不設卽鎮守如故、邊民自此遂絕望耳、春行
客也、而猶爲彼言之弗置、蓋已犯權貴、幹過好事、處
置有成算、機會難再失、事成雖在繼者之手、異時追
論、或得爲去後思、不敢誣也、

寄程兵備

展城

近得鄂省人致鄉信、彬南路近月賦出流劫、而我軍
擒馘幾三之二、蓋前所未有之功、真可一慄、邇復不
知何如、此惡種門戶極多、恐未肯因此一挫、便不出
也、展城事承示財力未辦、少多之間、尚無定議、夫土

所有

木工程不加心計而委問下人未有不患于難成者。

成。甚。然。後。察。酌。衆。謀。

古人作事自有法。嘗記宋張覺知處州時。有議築紹興園神廟垣者。匠計無算。覺教之自築一丈長。約算可直若干。卽以若干與匠者。董役無所得焉。黃幹知安慶府時。請城安慶。以備戰守。城分十二料。亦先自等一料。計其工費若干。然後委官吏公寓人士分料主之。計人戶產錢起丁夫。每日役若干。某鄉民兵若干。某鄉人夫若干。分部于某人。料分或撤運某處。土木應副某料使用。某料民兵人夫。合當更代。合散幾

日錢米具有成算。執事幸做而爲之。此小興作特易
易耳。彬城東北隅。自可仍舊。而西南一隅。不可不寬
爲之地。磚土等項。幸勿容入于近學。後及左右開鑿
燒造。庶使此方地脉保全。此區區闔學有識者之至
感也。

寄河南巡撫陳都憲

部糧

部糧違限官之在任。公然不至。納糧倍價之民。在此
空然獨守。月復一月。未見了期。所以賢治禪助之法。
春違呈已悉。其各八年京邊起運與七年前者不同。

七年狼價于內府者，戶部摠收，委官召商代民上納，裏面使用，盡得省減。其他倉場如是解戶從便寫買，雖有加倍，不難措辦。今八年懲前司，徒得罪之故，內外各倉一一要納本色，解戶尋到攬頭百端打點，至買上官，比原徵銀動加一倍，加三之一。區區小民，何以堪之？該司見人情洶洶，奏告本狀日積，山東叅議閔楷呈部未行，會春至京，亦呈前事，幸蒙當道查例奏准，將在此極重山海等倉折收價銀，緣河南一省京邊起運倉場九十餘處，今准收價倉場口分，纔七

慮耳在京內府賠償極重去處仍本色春承委于此
事有專責理難坐視不加督併則前積後壓致誤國
計加之嚴督則此吾百姓也客此異鄉耗費不貲賂
補何及欲其完結不過勒令借貸借貸之物遺債將
來本與利均將何償給枷棒拷箠之下家破產蕩非
有死卽逃耳彼舉放者多出權貴往歲追需已有例
子解戶旣竭徵及花戶中州新脫兵變恐秦人之箕
會頭斂亦無處也用是冒昧復爲陳奏其情具在疏
中而不獲詳言者庶幾所司肯爲處之之地今之世

宋時諸公已言之詳矣

事理會得，但稍分明，便行不得此事。今當道行下議處，本非樂奏初意。然既查有近年叅政南鏜、徐以貞、叅議汪獲麟故事，今日不得不爲此處。此事非獨要事早完，但使大戶免揭京債，卽省得他異時出利。今姑以一大戶言之，某人賠銀百兩，借到官銀百兩，異時止還百兩，揭到京債百兩，就用還二百兩。當道因此定擬，十分爲率，令原來大戶賠補二分，布政司借到官銀幫補八分。待候今年徵收稅糧之時，帶徵補還。卽大戶賠補不過二十兩，花戶幫補不過八十兩。

若揭京債雖二八分數孽畫大戶亦不免賠四十兩
徵及花戶乃至百六十兩民生日困頭只管重更起
不得可見今日不得不爲此處此處只是第二三着

豈如戶部摠收價銀召商上納全免賠補幫補之爲

愈緣外吏無善政只是司農不相照應耳干碍裡面行不得也春訪到各倉場上納各項

錢按價值一省大較賠銀一十四萬餘兩除彰德府

積有帶來餘銀賠補納完外開封等六府并汝州所

屬除未到州縣未經寫買已到者除餘銀幫補外實

該賠銀十萬二千八百餘兩春惟本布政司官銀各

有頭項難可便借得來。而吏民居此日久。西江有水。難救近渴。守株待兔。不是良計。不免分付委官。酌量本縣民戶。逐旋借貸。完結。比來揭賠。完過糧草數目。已過半矣。今奉部檄。差官赴司。守取官銀。不必盡如原數。若打疊得五六萬。亟早解來。裒多益寡。截長補短。儘可救急。山東大戶。所賠糧價。見閔叅議說尚多。于河南。但山東與河南不同。山東自有泰安州無碍銀錢。布政已取到三萬餘兩。巡撫衙門又爲預處上中下。則人戶銀四萬。有彼二處解到。并餘銀幾十萬。

餘兩以是轅合。定比河南了事早也。河南未到州縣部運官可恨之甚。大戶不到。或到不肯下批。或下批復逃。論情猶是可恕。而官乃敢爾。比來大戶見當道此處。乃有陸續先官到京。來下批者。非奉以言安之。彼將無投奔處。其有不復逃者乎。此等不才違限委官。其設心謂既已違限。不如索性去遲。反是便宜。到頭一着。只拚箇送問便了。他復奚恤。伏望查照先令呈文。住其俸糧。差人鎖解赴京。完所未完。庶摠管不致久累。上下兩便。

序

臨戎決勝圖序

臨戎決勝

我都憲涿鹿鄧公之以侍郎特起而撫中州也。爲正
德辛未秋，時劇賊猖逆河北，轉入河南，斬木揭竿，鴟
張狼噬，所在吏民習于承平，倉卒聞變，束手無策，城
當者潰，師遇者敗，廟堂僉議巡撫之任，非公不可，故
卽其家起之，公拜命，卽日單車就道，旣至，審察郡邑
孰岩孰夷，亟調兵食，孰緩孰急，孰最要害，孰當預備，
器械之繕，城隍之完，倉廩之時，上兵之選，民馬之厝，

京邊軍之請國帑之借一一自公心計手畫事無遺力。智無遺慮。于是地方始藉而固。人心始恃而定。遇敵始有可遏之勢。可杆之具。明年壬申春。軍乃大集。不數月。賊獲殄焉。公驅馳塵岔。閱歷寒暑。屢貼危險。曾不爲身家一毫顧恤。在處必齋鉞從事。嚴紀律。定方略。謹偵伺。賊動靜輒先聞。有以究其情狀而百爲之防。陽而誘之。陰而襲之。彼此而携貳之。于脅從則示以來歸之生門。而出之陷穽。于係虜則拔諸焚溺之死地。而復之衽席。公忠貫神明。機叅造化。遂使將

士用命，天悔禍而人厭亂，而事之告捷也。公可謂文武兼資者矣。公智明勇功，遜不自居，錄狀之上，思寵之及，獨後諸同事者，公可謂不矜不伐，善處功名之間者矣。若夫中間不如意事，西平之捷而有汝寧之捷，洛陽之失，蓋長子帥師，弟子與，大易有訓，時實爲之，公何病哉。事久而論白，此吾輩之所以深服公于今日也。考事始末，無非公功者。昔宋虞允文奉謀軍事，得統王權敗軍，致采石之勝。劉琦安撫荆湖，請制置使沈介遣兵相助，官軍日盛，旋執賊酋，徒黨盡。

戮自今而觀功當誰始春固存以知公今日之所以
爲功者矣時有繪公臨戎決勝圖者春曰雙節六纛
虎旗豹矛登金壇而擁玉帳丹青之所貌于公如此
邇時心事存亡旦暮死生瞬息所以運決勝之籌而
成掃蕩之勳者圖者莫能悉也於是從而序之

送陳都憲巡撫延綏詩序

西北重地三邊五鎮之稱皆國初制也而榆林之特
置則自正統開始所謂延綏者非邊鎮中最當要害
者歟延綏地方東連山西偏頭關西直寧夏花馬池

相距二千餘里，其間有所謂黃河套者，非要害之所
在者歟。偏頭、寧夏一帶，防守在套外，而虜騎乘冬河
凍，乃得長驅入套。以伺我間隙，擾我心腹，則茲地也
者，非尤當重者歟。赫時虜擁衆來，住牧吾套內，或間
歲或四五歲，民竭遠輸，軍動久戍，境路騷然，不勝荼
毒。今既去矣，患當預防。事貴先備，善謀國者何以處
之。陝之爲邊，辟扞天下，延綏實腋，其間守臣建白，有
乞朝廷無以河套陝西而以河套視天下者。厥重蓋
如此，而可輕授其人乎。是故才識非敏達，不足謀兵。

機年力非富強不足當闢寄生長非稍近其地土風
或未有所宜宦游非素歷其途邊事或有所未悉近
制兩畿輔十三省方隅邊鎮所在必以都御史任巡
撫兼理軍務位重責大皆出簡命中外異用必就其
長下弗敢輕舉上弗敢輕授也。迺者湖廣巡撫缺朝
廷簡于衆謂河南布政使司左布政使陳公資望惟
協既推任之已而延綏缺巡撫簡于衆茲古朔方河
套地方得敏才識富年力而生長之地宦游之途且
素其人誰其長遂改命公且詔公共遊往焉朝廷重

命前所古款項

視河套于延綏不輕授且急也如此豈無謂哉公西
駕有期右布政使陳公首諸寮繼聲而屬春以序春
昔官職方行視陝西馬政往復三邊且一年駐榆林
幾兩月目考宋唐漢秦守邊固圉之蹟竊怪史稱漢
武帝聽主父偃城朔方郡循秦舊因河爲固當白羊
樓煩敗走日計亦非失然民徙十萬口轉漕甚遠自
山東咸被其勞費數十百鉅萬府庫並虛唐中宗用
張仁愿于河北築三受降城乃突厥默啜雄爭之隙
置戍虜腹未見其可而六旬間三城就朔方自是無

寇。歲。損。費。億。計。減。鎮。兵。數。萬。仁。愿。所。築。卽。漢。所。城。郡。
地。彼。此。利。害。乃。爾。遼。絕。何。哉。今。不。可。不。求。其。故。也。唐。
末。朔。方。已。據。于。拓。拔。氏。石。晉。十。六。州。重。爲。遼。有。而。宋。
人。于。此。矻。矻。與。元。昊。競。韓。范。之。才。有。弗。克。濟。匪。其。罪。
也。我。朝。取。天。下。于。夷。狄。極。弊。之。後。今。日。遼。事。大。非。宋。
比。仁。愿。之。事。業。其。不。有。在。乎。春。職。方。時。所。及。知。成。化。
弘。治。間。守。臣。請。兵。搜。套。之。議。相。地。移。戍。之。議。遠。烽。堠。
便。營。屯。之。議。或。欲。永。禁。畜。牧。銷。賊。覲。覲。或。欲。廣。立。耕。
種。資。我。供。億。衆。凡。角。持。暨。今。未。已。一。代。經。略。豈。無。一。

策在力行之耳

以人。有。一。〇。八。〇。必。有。一。
 可用之良策。天其資公以事業于今日乎。自古中國
 守邊皆將卒宿內。以禦戎虜于外。而茲地今日。虜廼
 得入吾內。而吾反設防守于外。若之何可不求漢唐
 之蹟所以之故。而為之所也。此善謀國者之所以有
 望于公也。今非其時矣乎。以公才與年。為國家辦大
 事業。有餘地。春于公同年也。而為斯言。非私望也。

送趙都司序

湖廣都司

或問子選將之法。予曰。取之門第。不如取之行陣之
 得實材。求之內服。不如求之邊徼。之得實效。門第者

膏腴恩蔭子鮮克讀父書而行陣多汗馬功奮之人
武勇已著。生內服者。坐而談兵。豈知古法之不足恃。
而邊徼所出。性習安焉。地方夷險之跡。蠻貊向背之
情。固其少而諳之者也。然則執此爲今日選將之法
可乎。天地生才。彼此何間。予此言特舉其大凡耳。而
今之選將者。乃復相以軀幹。制以階資。較以騎射。察
以過失。裁以章句。而其他美。一無所干。計是白起之
精悍。不用于秦。韓信之落魄。不用于漢。杜預之射不
穿札。不用于晉。李靖之身挂罪累。不用于唐。而韓世

皇明經世編

何文簡集

湖廣都

古

平露堂

忠○之○目○不○知○書○者○不○得○用○于○宋○也○豪○傑○知○略○出○衆○之

在○中○下○

白○起○李○牧○安○說○皆

士○不○幸○而○在○下○位○其○資○貌○膂○力○不○與○才○副○而○吏○議○罔

賢○文○字○弗○取○將○何○以○自○發○乎○然○則○選○將○之○法○其○必○略

是○而○後○驪○黃○牝○牡○庶○幾○其○不○失○也○嗚○呼○今○之○任○選○將

者○其○足○語○是○也○乎○吾○湖○省○都○指○揮○趙○君○惟○遠○長○自○炎

陘○家○承○關○閔○而○早○以○功○業○自○奮○自○五○開○衛○指○揮○使○晉

今○職○今○年○朝○賀○京○師○事○竣○過○予○別○因○及○疆○場○事○凡○湖

南○北○廣○西○川○東○貴○州○之○境○溪○峒○山○箐○數○千○里○指○數○歷

歷○猫○獠○猺○獍○種○類○猥○雜○皆○能○本○其○居○而○名○之○某○地○爲

要害、某蠻最頑、獲某處有某策可備、某策須某時可用、某衛軍可相援、某府縣糧可相濟、言若圖畫、繁在凡格、余爲之驚曰、君其吾省今日將帥選乎、選將之法、予言其大凡耳、徵于趙君、有不誣者、君官級浸高、凡百副其才、而持身謹慎、悅禮樂、熟詩書、見稱鄉國、徵于今之選將者、其容不以君爲首舉乎、君行當提兵爲天子守邊、固圍犬用于南、不疑大丈夫之所樹、立方來未旣、予茲先拭目矣、故于其行序以送之、

雜記

軍者幾人，強不能攬，重不能持，鳴鑼雙收，多出姑息。其在外省，併鎗之爲故事，抑又可知矣。南方衛分，又有父子祖孫，未曾併鎗，仍冒旗役者，遇蒙征調，報功陞職，往往皆是。蓋緣功次本冊，祇開旗役，不分已未併鎗，該部無由稽查故也。今後合無行移內外監比官，將本部送到教場比試官舍，嚴加閱視，走馬跳澗，射箭使鎗，俱要一一便利，方作雙收，單收一不中，度送回本部，遵照太宗皇帝聖諭施行，及行各省鎮巡官處，查出各衛未曾併鎗旗役，照例俱革爲軍先

年有冒役功陞職事亦就查革百戶准作實授總旗
總旗准作實授小旗功陞多者准此遞減一級若總
小旗弟男子姪補替須在十年之內方纔聽其告併
併不中者卽充軍役本都司仍將併過旗役姓名造
冊繳部使報功陞官之日所司得于查考如此庶幾
世廢之子知尚考馬而于 祖宗良法美意求才覈
實之道亦不至墜失也。

一國家制律以警有位懲艾之典不分文武伏觀大
明律文武官犯私罪條目輕重各有攸歸若軍官私

罪該答者附過收贖，杖罪解見任降等叙用，該罷職不叙者降充總旗，該徒流者照依地理遠近發各衛充軍。祖宗之制未嘗不與律文職者相等，而近來事例過于寬貸，有犯監守常人盜受財在法滿貫，律該絞斬者止發邊方立功，監守常人盜在法不滿貫，與求索科歛誑騙計贓滿貫，問該流罪減至杖一百，徒三年者俱運炭納米還職。夫文職犯該贓私雖在有不能盡行法者絲毫罔不革職，在法滿貫亦必充軍，而于此輩獨寬之以必貸之條，示之以可解之路，刑罰失中，恐非國

家制律初意其犯該竊盜拘摸盜官畜產白晝搶奪
姦宿軍妻行止有虧者俱發爲民此例之行雖若足
以懲惡然其子孫卽得承襲是其職事特舉此遺彼
有爲民之名無罷職之實彼亦何所介意軍職降級
調衛者本犯存日子孫不得替回原職爲民者罪本
重于降調却反得承襲揆之事理亦有未宜今後合
無本部會同法司從長計議軍職有犯除公罪及真
犯死罪并本條各有正律外其餘所犯但係贓私俱
依各例律條該管者附過收贖該杖者贖罪解去見

任各降一級。于原衛所帶俸差操、犯該姦盜等項、行止有虧、敗倫傷化者、照今例發回原籍爲民、無原籍者、于本衛所隨住、仍照畏罪脫逃舊例、候身終之日、及年六十、方許子孫承襲。原職若犯監守常人盜產、庫錢糧、受財枉法、不滿貫、夜竊盜、掏摸、盜官畜產、搶奪、哄嚇、略誘、掠賣、詐欺、誣騙、拐帶、求索、科歛、詐僞、該徒流者、不必贖罪。俱照地理遠近、發各衛所充軍。其賊至滿貫、該斬者、若各人祖父係開國靖難功臣、許令子孫襲受原職。若係近年新陞者、各降一級。如此

庶幾世祿之家有所懲艾。法令克一。名器以重。而不檢者。自不敢輕于蹈罪也。

皇明經世文編卷之終

皇明經世文編卷之一百二十七

陳子龍臥子 宋徵璧尚木

華亭

徐孚遠闇公 李 雯舒章

編輯

吳培昌坦公參閱

何文簡奏疏

疏

何孟春

陳萬言以俾修省疏

修省八要

嘉宗時近倖相用事公此疏甚切

臣聞之范睢獻秦王書曰語之至者臣不敢載之於

書其淺者不足言也蘇軾上書其君仁宗亦曰臣試

論小者而其大者將有待而後言也言係乎事事事有小有大泛言則淺究言則至臣今獲承明詔將言其淺而小者乎亦將言其至者人者乎言係乎事事視乎時時之所急雖小而非泛言不失爲至非時之所急君子不以溷其君言固將先乎所急者雖然在其君聽之何如耳乃者清寧宮災陛下夙夜祇畏思勅天之戒遣官分禱天地太廟社稷以致災之故首罷毓秀亭之工作已成者而撤之特詔廷臣痛加修省凡有所見許其直言中外執事激衷申悃謹其忍

默。浹月之間，囊封投匭，罔不上聞。自以朝無諱言，時
難再際，延頸企踵，願俟報可。而九重玄遠，所見施行
未盡。遂言者之所望，豈所言者皆非時所急者耶？不
然，則此詔也。宋司馬光之謂數年前亦有之，而今爲
修故事而已。乃今閏十一月日有食之，災見于天。古
之君臣，尤不敢忽。陛下修省之誠，當不遠已，毋致
臣下有此疑也。當世之務，入于弊者多矣。臣以詔旨
徵諸道路，得數事，亦欲爲片曝之獻，而恐非時之所
急者，敢先以果臝斷公任委爲。陛下勸焉，而始及

之以上補修省萬分之一可乎臣惟前日宦官李廣
未死氛祲之盛至薄太清陛下于聽斷不無有所
借任委不無有所專今天禍其身身死罪露宵旰之
間聽斷果矣朝廷之上任委公矣臣猶以爲言者
蓋欲卽已往勸陛下于將來庶幾陛下有所懲
艾不致將來有如廣者之所爲也書稱萬幾詩云普
天率土人君御煩治廣代天工者雖有其人而動皆
覆白于上苟聽斷不果意緒紊于遲廻弛張滑于猶
豫藻鑑昏于繁累則政出多門命從中降而紀綱不

可得立，爵非士共，罪非衆棄，而賞罰不可得明，前之所是著爲律，後之所是疏爲令，而號令不可得一，太阿且爲人所盜弄，而能禁其毋割乎？史稱漢宣神雀五鳳之治，吏稱民爲由其信賞必罰，聽斷惟精以得之也。元帝嗣祚，權入弘石之手，而宣業遂衰，田其優游不斷，牽制文義以失之也。箕子洪範言沉潛剛克，繼之以作福作威，子思中庸論天下之至聖，必及于發強剛毅，足以有執，蓋果之爲貴也如此。陛下自卽位總覽政事，如天之運，本無疑滯，而二三年間各

衙門所題請事宜。或不卽出。積之旬日。出卽有非原所議擬者。中間豈無有奔走倖門。交結近侍。黃綠肺腑。依託唇齒。以相引救者乎。躁者望連化。戾者覲苟免。私者願獨利。左右之人。惟利是嗜。惟黨是親。養諛導佞。排鯁撓直。所偏好則鑽皮出羽。曲爲掩覆。所偏惡則割肉安刺。外生科條。不顧遠圖。不恤清議。是以人情洶洶。衆口沸騰。見某人某事不當如是而如是。則曰某者陰爲之地也。某人某事當如是而不如是。則曰某者陰爲之間也。某人某事始不如是而終如

是則曰某者陰爲之幹旋也。臣亦不能無惑焉。如都御史王越以傳奉詔不果用者。兵部議推總制西路重臣所推閱數人。及越乃賜俞允。王越得陛下之識擢推究其源。豈無有譽越于陛下者乎。給事中王綸以詔與補外者。吏部故累以布政司叅議缺聞而所補皆所陪點之人。踰年而後得叅議。前之不得有毀綸者矣。團營官軍。兵部題准不許奏討做工。而毓秀亭等處工役。竟復不免差撥。此固有人以啓陛下然也。甘肅守臣奏復哈密乞憐降勅及金印命服。

封其國長、聖斷著差官法、兵部具題欲無差官、詔如前旨、于是擬差二員以上、本人一月有餘、復得旨、准不差官、夫前欲差官者、陛下之意、久而不差、所差之人、必有非、陛下意之所欲差者、庸知左右有不欲差其所厚者、以僥倖功名、而無陛下之命、故此未發乎、陛下春秋鼎盛、英睿邁古、淵衷所處、未應左右能與、惟夫遇事稍尙安詳、故有如李廣者、得進言也、臣見近年科道官及諸執事所上封事、又多有人留中者、彼其所言、不干廟廊、則觸權貴、中鯁

然常恐鷹搏狡兔，反爲兔噬而。陛下輒以留中，使
彼不得請命，却步喪氣，徘徊鬱塞，叩天無路，何也。奏
文之不可行，與不行兩言而可夾者。陛下豈以
前代故事，容受直辭，則欲常在斧扆時省覽耶。抑欲
保全言者，以滅謗。且宣付史館，以成君臣之美也。臣
不能知。然知陛下不行其言，則必無是。無乃其言
謬悠，無可採者乎。彼之敢于上聞，傾瀝肝膽，其思必
熟，其計必審，非以爲已謀也。以爲已謀，小加譴黜，大
正典刑可也。非爲已謀而國家之慮，縱有不熟思

不審計而傷于戇，失于裂滅者，陛下亦當山藏海
納于短取長，優示 旨諭，以獎敢言之風，未可棄置
如無漫不加阜白，使左右者得以甘心而成其曖昧
之禍，以誣風節之士也。書曰：小人怨女，詈女則皇自
敬德，厥愆則曰：朕之愆，不敢含怨。盛德之君，忍乎匹
夫之無狀，而必省諸已，况于在廷之臣，爲國元士，負
其慷慨，以言爲獻者乎。商周之際，以不諫而得罪者
有矣，墨刑是已。未有諫而得罪者也。諫而得罪，見于
末世，然漢唐有道之君，亦自不爾。陛下始意圖治

求言甚切。先朝以言被黜之人，如林俊輩，無不起用。而御史彭程以言事罷爲民，按察司副使楊茂元以言事降爲府同知，彭程、楊茂元之罷與降，當時必別有以得罪者。人相傳言則以爲爲某爲某矣。禮部郎中王雲鳳以省牲日，駕後騎馬得罪降知州。雲鳳先常發李廣之奸于陛下，故論者亦謂此乃李廣因事以中傷之，所謂曖昧之禍也。今日之給事中胡易、御史胡獻，皆言事者。胡獻見蒙降調，胡易猶在禁獄，欲加之罪，固自有辭。臣愚但恐非陛下求言始

意臣聞彭程已死楊茂元王雲鳳行當復用于論定之日胡易胡獻二臣者陛下儻查無大過乞速賜矜憫以釋論者之疑昔唐太宗問魏徵比來政治對曰陛下貞觀初導人使諫三年以後見諫者悅而從之比年勉強受諫而不平也徵之對不及政治政治之進退實決于此臣願陛下于此察焉得頌不如得箴得唯唯不如得諤諤得所可悅不如得所可警人情無甚相遠彼顧欲噓死灰以自焚啖野葛而自毒耶白璧不可爲容容多後福有能奮然不顧盡其

言于天子者，蓋素有風節之士，不多得也。而言脫其昆咎及其身，怨種子前，患生于後，彼非失心遺死生之人，則誰肯更言者？將來流弊，人且浮沉自營，心口相戒，甘苟翫以誇太平，執文具以爲觀美，務因循而長偷謾，樂輒熟而憎剴切，隨時好尚以固寵榮，雷聲是非以便附會，臣不識此于盛世安所取乎？此臣所以願陛下之聽斷果也。人有常言：天下大器也，措諸安地則安，措諸危地則危。人主有是大器者也，是大器可以一人有之，然舉而措之，一人之力則不

能濟故必有以借其力于下、有以借其力于下、則下得與力、君子與力則安、小人與力則危、故力不可輕借、人主于共理天下者、而任委可以不公平、易泰之初九曰拔茅茹以其彙、否之初六其辭亦然、此不無謂也、師之六五日長子帥師、弟子與師、解之者謂君子用事而使小人參之、之過也、參、木以補、苓、黃泄之、不可以爲醫、繩、墨以引、斧斤背之、不可以爲器、甘滑以進、苦澁雜之、不可以爲味、理必然者、陛下視今之所任委何如乎、萬邦黎獻、共惟帝臣、委命致力、不

爲乏人而天冠地履尊卑分懸上下情隔苛禮維甚
交誼未孚言獲傷舌動遭掣肘貂璫乘馬黜運潛持
陰邪之徑貨利之關日闢日廣爭馳捷出人才雜揉
吏事滋蠹陛下且不知其底極矣陛下試一思
之致此固有由也古之君臣相取以圖天下之治其
相得甚相歡也都俞吁咈談燕一堂推置心腹洞徹
表裏纖芥之嫌不萌其間是以其臣知無不言言無
不盡出其身爲天下營各執其職而始終無所忌避
而其君所爲而成所欲而遂陛下能如此乎臣生

長外郡見臣郡之守所屬來謁必門卒爲通所屬急

此言因小以喻大

于見無不賂門卒者既見以簿書上簿書全積則付

房吏看詳所屬恐其尋隙以議無不賂房吏者門卒

房吏于守何親而得賈利而假權况乎人主之左右

爲狐爲鼠爲鬼爲蜮豈無賈利而假權者哉外廷固

不如內廷之近密也士大夫固不如宦官宮妾之褻

昵也前日李廣未死陛下之政事彼得而撓人才

用舍彼得而議九重非時之旨諭彼亦可以時而假

也群臣趙趙齟齬于外觀望風旨李廣之不若也固

宜有苞苴其門。相與生盟死結者矣。名位已盛。欲其
固塞。宦遊未達。欲其進級。地在閒遠。欲其招携。跡涉
孤危。欲其培植。事防詿誤。欲其回護。衣冠清流。豈真
不知恥哉。無以結知于 陛下。故結知于 陛下之
左右。憂時之念。奪于有我之私。徇國之誠。不足勝其
營身之計。士風如此。 陛下可無挽之。科道請按李
廣。賊簿以治交結者罪。 陛下秘之。但令指名來上。
而卒置不究。科道所指之人。得于所聞。末由皆實。
陛下置之不究。論者咸歸 陛下能惜大體。然言路

崢嶸昉立風采。陛下亦當黜一二之尤者以示後勸。陛下用意過厚。以爲彼附李廣。自廣有寵故也。廣死無所寄寵。彼將自罷。何足深責以敗厥類。陛下此處且能惜士風矣。臣以爲陛下果有此意。莫若自今以後。公于任委。孔子不主瘠環而臧倉沮孟子。邪正必不兩立。今之士大夫。能嚴顏正行。無求于李廣。然有如廣者。復存于今。當其氣熾焰張之際。抑將奈何。閒居諱語。不過俛首太息而已。彼誠不得。姦嫉妬是畏。無以展布四體。罄竭思慮。事功之的。難以

責其必至。臣以爲此三二十年來任委未公之積弊所致也。自古願治之君，無不詳責于臣下，而攷其政，詳責于臣下。使賢否不能隱，考其政，使是非不敢私，所以使其不能隱，不敢私者，非君之智術，以伺察猜防爲也。臣觀唐太宗論其臣房玄齡輩優劣，人爲數語，斷其平生無爽。諸司所行事，委曲皆悉之，非太宗能以身親群臣朝夕，不廢延納，何以得此。恭惟我祖宗在位，建官惟賢，位事惟能，而優接臣下，罔存形迹。早朝奏事未畢，每于晚朝盡之。正朝之外，尤隆經筵。

勸講之禮。遇有機務輒駕御左順門召六部大臣與之商確。間臨內閣命學士定其可否。然後施行。故大學士楊士奇有三朝聖諭錄。李賢有天順日錄之作。且載列聖所與議論之言。藹若家人父子。傳播四方。見者踴躍。今陛下早朝視事。能幾時刻。通政司引奏之外。德音不可復聞。晚朝曠廢。經筵勸講之禮雖存。而聖意無所咨詢。侍從之臣。講罷亟退。殆以粉飭治具云耳。天下事陛下一切徵諸尺牘。何以詳責于臣下。而考其政哉。臣惟臣下之告君。見于

疏奏不如見于對陳之爲切。疏奏之言不如對陳之
言之易爲功。蓋疏奏者情每難盡，而對陳者從容出
之，每有餘。疏奏者以言期上之行，而對陳者得反覆
究竟利害之實，而上行之自勇。疏奏者人遠，讒邪或
蔽之，而對陳者下輸其情，上獲其益，公論具在，無扞
格也。今群臣其誰得更番需次對陳于 陛下者？天
下事一切惟尺牘之聽，是以賢否是非，左右得以調
停消息，而一陛下無自知之，無以詳責于臣下，而考
其政，何得無其弊哉？臣聞之我朝之有內閣，猶前代

之有中書省也。我太祖皇帝罷丞相，革去中書省。太宗皇帝故以老成文儒，選居內閣，專備顧問，預參密勿，是內閣者論道經邦之地。唐人謂政常在中書，爲治本。宋人謂事不由中書，卽亂世之法。臣以今較之，政宜常在內閣，事不可不由內閣。陛下盍隆其禮而重其責焉。大學士如楊士奇、李賢皆膺列聖之眷注，故得盡其才。九重有一言一事，皆得議于其始，故不至布出于外，而致誼謬之紛籍。今則不然，所以有委任未公之積符也。詩曰：雖無老成人，尙有

典刑記曰大臣不治而遷臣比矣。故大臣不可不敬也。是民之表也。遷臣不可不慎也。是民之盜也。臣願陛下恢張經綸之慮。明目達聰。兼聽博采。日與內閣講論當世之務。大小條件。內外便宜。一一付之。該某部所掌。則令某部與俱。不畏猥煩。務求今之所以異于古者。何如。得失之机。何在。設施之方。損益之節。以何爲善。欲變害以爲利。何爲而可。詳審斟酌。旣得畫一。則斷而行之。仍令內閣及府部耆舊大臣各薦其所屬科道預舉其所知。以應宣召。以匡所行之不逮。

不以小恩廢大義，不以私憾枉公法。不以舊習妨新政，不迷于兩可之辭，不沮于交鬪之口。如此而行，不當者少矣。若復有之，六科得而繳駁，十三道得而糾舉，定不至以水濟水，泛害無極也。經筵之日，陛下誠能好問好察，于休勿休，孜孜無倦，侍從中當有以正己之學爲格君之學，諷誦詩書，嘉揚善導，以益聖德于緝熙者。我太宗皇帝嘗詔武臣有曰：上能推誠，則下樂盡力；陛下能公于任委，臣下感激，自然百倍不錫馬而榮，不授鉞而懼，同心併智，相與淬

礪以效區區將自不容已。陛下于此而循名以責其實定其黜陟才之短長事之軒輊舉在冕旒蕪纒之下其不勝任之人科道劾之而被非彼空文。陛下罷去之而被不怨彼知天之不可欺。陛下之深知也豈復有以賂啖左右而取罪哉當此之時雖有李廣千百亦何能爲埽除幃闥免無他責幸矣外廷既昌內廷自戢士大夫之氣旣作宦官宮妾之勢自不得行此臣所以願陛下之任委公也。陛下幸裁察焉果聽斷公任委二者臣言之矻矻覲縷切至

時之所急，無大于此。董子有言：正朝廷以正百官，朝廷正而天下治，其道如此。臣敢以此勸。陛下，臣言非老生迂士之泛談也。若夫臣之得于道路者，請別白而終言之。其一日：臣聞郡守縣令，民之師帥，古人有是言也。縣得人則百里受其賜，郡得人則千里蒙其庇，或非其人，則百里千里嬰其害。聖君在上，思天下匹夫匹婦，有一不獲其所，猶當不可，况百里千里之生靈，可寄之于匪人乎？臣觀今之爲陛下守令者，有非其人者矣。狼羊相牧，禽犢是資，闢茸醜

饜所在皆是。陛下之民有不獲其所者矣。筋骨供于棘舌，肌膚刮于鋒刀，終歲瘡痍，痛定復痛。知治體者，能無怵然。古者郡守入相，郎官出宰，守令之職，甚不輕也。今之爲知府者，皆四品，廷臣累日積久而後至，宜少不才者，而府佐及知州知縣佐貳等官，則不皆進士爲之。進士出身者十三四，監生吏員出身者十六七。此郡縣所以有不得其人者歟。世之所重在進士，考課之法，旌異之典，每先焉。監生吏員出身者，流大較，鐘鳴漏盡，日暮途窮之人，志氣銷蝕，精力疲

憊。僅勝冠裳。無有幹局。望利而饒。觸事而頽。流風踵
類。考課若其弗愬。彼浮家飄宅。何所于歸。十人而九
皆坐可黜之列。無以酬其燈火棲遲之望。塵埃奔走
之勞矣。其中有錚錚于鉄。蕭蕭而蘭馨者。雖其上司
旌異間及。該部自以非進士。此無所事旌異也。臣以
爲不然。趙禹之才。出于佐史。龔勝之賢。發于郡吏。黃
霸丙吉薛宣。非漢名相乎。嘗爲卒史。爲獄吏。爲書佐
矣。人才何嘗之有。作之則振。推之則靡。進之則前。退
之則卻。所賴上之人。執其柅耳。天下善人少。不善人

多才者無幾。不才者比比。號名進士者。珉中玉表。有不才者矣。郡縣之職。今况不皆進士爲之。監生吏員出身。常居大半。而上復無以爲作之進之之機。采名不采實。惟其出身之拘。而不較其才。使監生吏員出身者。才者無以見其能。而不才者遂無顧藉。曰我非進士比。空自苦何爲。于是受賂營私。不復以承流宣化爲事。巧需酷筭。一毛不遺。上司至則厚奉迎。以寬指摘。飾玩好以市姑息。幸不失官。則以歲月廣爲子孫地。是監生吏員出身者。無勸于前。無懲于後。幾何

其不率天下而爲不才之端也。如此天下之民何辜焉。祖宗時其取人也廣。其察之也核。其待之也一。凡諸途出身之人。參錯有位。皆英英而騰。蒸蒸而升。有以自樹。今乃風馬牛不相及。一大府連數州縣。分職數十員。不數進士。進士外乃少可旌異者。考課之法不嚴。而旌異之典有所偏之弊也。臣愚欲乞今後巡撫巡按及布按二司分守分巡官。凡遇所屬府州縣掌倅官員。有政績超卓。堪事數者。分守分巡以呈。巡撫巡按處。事爲覈實。奏聞旌異。不以其出身之途。

而偏低昂之衡。該部按其旌異者，前後多寡，通擢用之，不廢乎資格之循，而無形迹之泥。進士者將益有所激發，監生吏員出身者亦將不肯自棄，而砥行礪節，斬標榜于時流矣。若復有曠職廢事害民者，督之于考課，于進士不以其名第加護，于監生吏員不以其生平可憐而加貸也。臣惟古今之考課道二，一察其守，一視其爲。守以廉爲以能，二者凡有官之最。臣以爲課牧民官者，又在以得民心爲本。世有廉者未必能有能者，未必得民心而民愛之者。非有响咻溫

暖之政而無歎息愁怨之聲不能也。臣故以得民心爲考課府州縣官之最。郡縣官員有廉者有能者有得民之愛之者旌異在部。該部旣按以擢用之。又每歲查照取其廉且能而民愛之者一人奏爲高第。如漢故事。陛下特降璽書獎諭以風天下。不得民心。雖文案無隙于照刷。而旌異無所取。使天下之爲守令者。知愛民是尚。而循良之歸。民將蒙庇受賜。游及于無外矣。其二曰臣聞國初各處未嘗有巡撫官。宣德間始以待郎都御史爲之。時惟南直隸河

南山西陝西有常置其他布政司詔遣有時一年二年而皆回今秩皆都御史除浙江福建外則皆有常置矣臣惟今之巡撫卽魏之慰撫大使隋之宣撫大使唐之存撫安撫使也宋亦時命焉而今爲重邊方領置之權腹裏兼轉運之職手持勅紙便宜行事三司屬其管轄數郡係以慘舒者宋神宗謂文彥博等曰諸道使臣職任至重宜謹擇人久于其任彥博等對曰爲治之要無以易此故熙寧元豐諸道使臣有久至十餘年不除代者勞効顯著則增秩賜金簡

慢不職、則削官奪賜、乘驛入奏、更互赴闕、呂祖謙至著以爲一代法、今之巡撫視宋諸道使臣、又爲加重其人、固不可不謹擇而久任之也。臣切見吏部推各處巡撫、都御史、該腹裏會戶部、該邊方會兵部、揣比停當而後上請親擇、何謹如之。然其受任、往往不久、人方與地宜、而地莫能留、地方得其人、而人莫與處、功垂成而來者交籍、事未集而謀者已易、其又不然者、屬府未及按部、下情未及體悉、六條未及舉刺、庶務未及興革、席未及煖、而座已非矣。今制歲差御史

一員巡按各處。若巡撫不久其任。與巡按無異。何復用巡按爲哉。臣聞宋司馬光有言。古者各守一官。終身不易。今居官者三年數月。輒以易去。望職事之修。功業之成。不可得也。臣以今日觀之。京官分曹列署。察察稱沓。似無不久任之弊。外官若不久其任。卽已不得究其用。下不得沾其惠。陛下欲行久任之道于外。又宜從巡撫始。近例巡撫官每年一次赴京議事。然當議事之年。多有以地方有事不果行者。臣請卽腹裏邊方爲限。腹裏三年。邊方五年。必須一次赴

闕。陛下親降德音。詢問民瘼。一以示其優異。一以觀其底裏。六部各奏其所行。果有成績。蕃錫而慰遣之。其有不職。科道得指實而論之。夫巡撫擇其人于先。而久其任于終。于更互赴闕之際。有增秩賜金之褒。有削官奪賜之辱。則彼之得久其任者。必爲有益地方。以無負陛下者矣。陛下他日股肱輔弼。亦必多得人。而不肖以徒手幸博陛下之崇級厚祿者。無有矣。抑臣聞知巡撫官爲撫治地方而設。浙江福建乃獨無巡撫。何也。閩越地瀕海島。番倭出沒未

爲無事。賊首葉宗劉鄧茂七嘗據其地，僭號稱王，攻劫城邑，哮噬無前。至勤王師就勦，血跡遍衢，始獲制其死命。以今視昔，二省地方獨可忽乎。湖廣鄖陽江西贛州，今因流民不靖，俱添巡撫官，而所管地方，連帶他省。他省願無巡撫，可付責耶。臣以爲地方東牽西制，下司難以奔命遵行。贛州巡撫官可改專管江西，彼鄖陽者非山西之延綏陝西之甘肅比，可以裁革。而江西福建二省，不可以不添設也。伏望陛下以臣此議下之。該部酌而行之，使大臣不孤巡撫之

賁各處俱得巡撫之惠。其三曰臣聞古之明君所甚惜于名器者，欲以奔走天下之人而礪世磨鈍也。惜之古人不易得，而得者以爲重，後世不知此，爵祿混混，源濁流濫。苟一男子，皆獲波及，無所于澤，肉視乳臭，坐致人上，視其名器不足爲其重，名器不足爲其重，而彼何德于上之有，上以其法應與也，與之下以其法應得也，謂上與我者乃我故物，雖得罪謫，不足疵類，如此上之爵祿，輕于糞土，不足以爲下勸矣。此後世之任子，所以識者致議于其時歟，臣惟我朝

祖宗立法凡文職大臣必立朝久勞勩茂名德隆者錄其子孫一二以榮後裔出自特恩不爲常例近年三品以上官始槩乞恩以子孫入監然亦有所裁節不至如宋任子之無謂使子任其孫孫又任其子也其武臣則不然父死子繼無子同產兄弟繼之無同產兄弟從兄若弟繼之又廣于倍子之法蓋我太祖皇帝平定四海太宗皇帝肅靖內難藉于武臣之力居多披堅執銳摧鋒破敵全一生于九死之餘惟其艱險故報之獨延長也今天下衛所已定恒滿

其位而後來之官，往往倍徙什百，不論事之難易，功之大小，例得世襲，其中乃有身不臨陣，徒以與叅隨頭目之末，而濫冒者，所獲首級，豈陣前手刃之賊，或由其勢邀，或出其貨取，或得于尸戮，守臣皆與奏報，張皇功次，繪無爲有，織虛成實，該部雖經節行各邊禁約，而弊端竟不少衰，今之新任陞有功之人，要無祖宗時比者，將不世襲之歟，墮將士立功之心，因墮廢食，未見其可，將世襲之歟，繼繼繩繩，無有限極，車載斗量，把權脫脫，其如後來之冗何。朝廷于此必

有道以處之。臣愚不能究竊願 朝廷之情名器也。
臣惟今文武途 食君之祿實一世襲既優諸武矣。
則法度之所繩于文武者豈容無異。今問刑衙門文
職犯賊必罷職。在法滿貫必克軍。而軍職犯該監守
常人盜賣犯侵欺在法滿貫該絞斬者止降級調衛。
在法不滿貫該徒流者止原衛帶俸。犯均而罪不同
科。甚不倫。臣質之律軍官有犯私罪該笞者附過收
贖杖罪解任降等叙用。該罷職不叙者降克總旗。該
徒流者發各衛克軍。 皇祖制律未嘗不與罪文職

者等。而刑官乃特遵近年條例近例。又有載犯該竊盜掬摸盜官畜產白晝搶奪姦宿軍妻行止有虧敗倫傷化者俱發原籍爲民。子孫承襲。意敗倫傷化者罪死而得爲民。法已弱于懲惡之典。而其子孫卽得承襲。是其職特舉此付彼。有爲民之名。無罷職之實。其罪且不輕于降級調衛之不得卽替者哉。或謂降級調衛者。猶存其職。爲民者其職亡矣。職乃其先人之功所得。職亡于其身。故卽承襲于其子孫。以報其先人也。湛恩汪濊。固如是夫。臣以爲今之陞世襲者。

不皆 祖宗時開國佐命之舊。至其罪。又每從寬贖之。其源不清。其流不節。爵祿益濫。如之何。名器之足爲其重也。乞勅該部計議。今後各邊有警。守臣上請興師。勢果緊急。該部卽行文彼處。出榜以示。從征官軍臨陣。若能奮先擒斬首級。回轡之際。徑赴鎮巡官處辯驗。以俟具奏陞賞。其中官軍貧苦。當陞而願賞者。鎮巡官辯驗明白。厚與賞犒。敢復奏報。依阿爲人首告。及該部或彼處巡按御史。異日廉察得出。凡關節所通。俱坐欺罔。又乞該部會同法司議定軍職前

項所犯罪各一斷以律成化年間事例不得引用仍
通行各處問刑衙門知會有問該罷職爲民者必候
本犯身死方許子孫承襲其先人非開國佐命之舊
承襲之日革去一級于原衛所帶俸差操庶幾彼之
慮後不敢褻上之名器而來不檢之輕于蹈罪也。

其四曰臣聞民惟邦本故山附于地君附于民文王
視民如傷非其民真有傷其心常恐其或傷耳。陛
下之民文王之民也。陛下之心文王之心也深宮
閒念及天下其亦以民有或傷者乎周公告成王

之無逸曰懷保小民惠鮮鰥寡是文王以傷視民之實也。陛下發政施仁惟其是而已。天災流行時不皆太和天下不皆三登萬庾旱乾水溢何歲而無民傷無瘳。朝廷則有不盡知者。臣以天下郡縣歲凶荒處民稅糧有一毫不獲蠲免者。有以知。朝廷之不盡知也。守令責在牧民民傷水旱彼宜不忍而彼有忍者矣。臣切見歲凶荒處耆老告報府州縣不敢謂實。委官踏勘踏勘者返曰實。始為申合于上司。鎮巡等官。鎮巡官不以為實。委官踏勘踏勘者返曰實。

始爲請命。命下該部查照當行始爲行文轉而下。府州縣卽其所傷分數以減征緩賦。民其有速獲貸賑者乎。凶荒之民枵腹待哺如涸輒之鮒。望斗升水于旦夕猶不足以救。而彼文書往復動經數月半年。豈其所堪哉。故今之歲凶荒處耆老不以報告府州縣以無益也。府州縣不以申合于上司鎮巡等官以無益也。府州縣委官踏勘不過騷擾一番鎮巡官委官踏勘又一番擾到頭貸賑之及其濟幾何。此守令之宜不忍于民者而亦有忍焉者也。此天下之凶荒。

所以 朝廷有不盡知而莫之救也。凶荒而莫之救
人如鬼腊突絕炊煙襁負相屬殪尸相籍誰與出涕
無賴于此嘯召烏合必多盜賊業可生活者均之爲
害而有司催督租稅又門常胥徒身常枷棒良民且
亦流移行劫矣臣以爲 九重軫念元元欲盡文王
如傷視民之實宜及先事詔諭各官所治倘遭水旱
凶荒年歲該府州縣預委公正官一員遍歷田畝勘
過分數明白開申鎮巡官處若係半災卽將當年夏
稅秋糧仰行照依所勘分數開除若係大侵卽爲設

法處置，仰分守分巡于該府州縣，預備倉糧，放支賑濟，事畢取具委官職名及貸賑若干回報，以憑奏聞。毋拘常法，必俟得命，蓋古人權以救荒，有爲之者救荒之道，宜速不宜緩，速則骨肉之恩，人人皆偏，緩則排門散粥，延街俵米，而不及事。漢謁者汲黯因視河內火，過河南以民傷水旱，遂持節發粟，不顧矯制之罪。今之鎮巡官行事于外，非黯當時者類。地方去京師遠，權以救荒，不爲專也。或謂朝廷誠降是令，各處凡遭水旱，不蒙賑則蒙貸，倉廩無所儲，民將有過

稱凶荒者。臣曰非也。漢文帝自卽位。賜天下民租之半者。再其後。除之而不收者十餘年。不爲凶荒。尙爾。况于凶荒而可吝乎。其五曰秦開阡陌。廢井田。後世仍之。天下遂有兼并之弊。然弊之所爲。止民間貧富強弱之相形耳。今乃有甚焉者。其皇庄乎。先朝畿內地空閒。籍之公家。佃民種而收入。其地廣狹有定界。其人。有定額。非以病于民也。近年看庄人役。罔恤國體。近庄田土。小民衣食之資。橫加侵占。由尋及丈。跨畝連蹊。求益不已。在庄傍者。產去稅存。征科之

及負累賠辦。富者以貧。貧者何能安養。民間馬牛羊豕。或誤逸庄地。卽不可望得歸。有以近庄故塚墓被其發掘。屋廬被其拆毀者。耕夫餉婦。稍不退讓。輒罹鞭箠。噤酸忍痛。敢怒而不敢言。按巡之使。過之而不敢問。守牧之官。卽之而不敢直。曰此皇庄。無如何也。然則九重厚民之意。何自見之。承平以來。生齒日繁。盡地力不足以給民食。而庄地今廣于昔。豈荒而待墾者。庄賦今贏于昔。不過掠之于無辜耳。國家未得庄之利。民間得庄之害。已無端矣。且皇庄之名。臣愚

有所未解。天子以四海之富，任土作貢，豈此數庄爲已物耶？昔漢景帝詔民徙寬大地，宣帝詔池籩未御幸者，假與貧民，郡國公館勿復修治，流民還歸者，假公田貸種食，元帝亦以公田及苑振業貧民。江海陂湖園地屬少府者，以假貧民，勿租賦。今天下未有寬大地，以便民者，畿內之庄固公田也。今縱不能以假貧民種食，勿租賦，可于民之所種食而租賦者，奪之使民以貧乎？畿甸咫尺，不能無害民之地。况遠于此者，陂湖園池課程之類，爲王府所有者，私蓄聚歛之

臣各操漁獵之具。而所在之民。能無苦乎。臣聞勳戚世族。所得附京恩賜庄田。家人亦有挾之以蠶食于他。有軍民之不逞。亦復以已業投獻權要。恃爲窟穴。而他取償焉。或投作陵戶。以嫁糧差。附京如此。在外王府之所認納。宜又倍之。齊民之好。治世之賊。心之所營。爲害不貲。不可不嚴爲之所也。臣愚欲乞 陛

下 勅該部官往勘 皇庄地面。從實丈量。若軍民告認舊業。鄰證有可執結。割而歸之。其庄占已久者。收爲本庄餘地。地坐某府州縣。則某府州縣就地起

科佃民耕種。止稱公田。毋得仍作皇庄名目。丈量已定。造冊繳部。歲收其入。查該內外某衙門應用。則付某衙門以備歲費。若遭水旱。與民田一例開除。既不失庄之賦。亦不病治庄之民。而畿甸之內。無滋毒之疾矣。該部仍通行各省。有王府處。陂湖園地。課程之類。係王府奏討者。有司准此例。歲爲送納租稅。免致王府差人督取。今後世族之家。各行戒飭。管業家人。毋致生事。軍民一應人等。舊非陵戶等戶。不許冒報。及不許以已業投獻權要。及在外投獻王府。敢復不

皇明經世編

何文簡奏疏
卷之二

修省

三

平露堂

悛及不行自首事發其業入官軍發邊衛克軍民發
口外爲民事于受獻者奏聞處置如此兼并之弊其
甚者度幾可去其六曰臣職司馬之屬竊檢軍政
條例有以見我朝列聖之拳拳于軍政也我太祖
祖皇帝武戡胡元治不忘亂設爲衛所養天下兵衛
若干所軍若干荒陬絕徼所在充斥今經百三十年
未嘗有大征伐以耗之也各處府州縣今皆有清軍
官而又有欽命之御史上下相兼專以清軍爲責
其清出軍丁例僉批解軍丁到衛例存恤之府州縣

清軍官清出數少者。候考滿行黜。解人縱軍在家延住。及在道而賣放者。併坐以軍衛所官旗。吮嘍所管軍丁致其逃者。降級調衛。立法之密若此。此外問刑衙門。又有問發克軍之律。清軍御史。又有招募爲軍之榜。日積月盛。是宜各該衛所。伍符尺籍。無所影射。遷徙謫刺。歲有增添。今視祖宗時額數。乃五不存三。七多亡四。邊方腹裏。一遇番替。僅僅無餘。何也。臣知其故矣。夫軍新舊相仍。有抽克者。有垛克者。有配克者。有投克者。淤漫天下。商出參隱。不容齊一。丁從衛

所逃故。則冊從原籍清勾。清勾不斷于通年。而逃故常虛于舊伍。承平之生齒。豈益減縮。奸黠之徒。或竄大戶而易姓。或贅婦家而避身。或乘調他衛而遂脫宗。或因流地方而遂變役。軍固不易清也。清軍官異境之人。在任不久。豈能備知本軍克調來歷。里書作弊。動曰挨無文冊。展轉屢煩。敝紙千百之中。幸得清出一二。起解之際。又非親丁。得解親丁。亦不得其正妻同解而去。所解去者。乃其義男女婿。其臨期略賣之妾婢耳。此類到衛。其有不逃者乎。彼該衛所率去

原籍數千百里。逃而再勾。率過數年。勾而再解。又出數年之外。在逃三次。于法應死。彼輒執稱原籍不獲。或稱已死。官司以人命至重。往往不肯追究。何怪乎逃故之常虛也。其據律問發者。官爲押送。沿路爲防護。際煙瘴。逼沙漠。筋攣膝糾。制雖實邊。而邊卒不可實。不徒其戍者之無生。而且累其送者之無還也。其出榜招募者。近能得幾正軍正匠及聽斷之丁。在所不許。彼蓬萍無蒂。孰保收籍。今之時。非國初比。土着素產。孰願爲軍。此例之行。虛名而已。此今之衛所所

以軍不免于缺乏也。國家大事莫大于戎。列聖奉
奉于軍政。爲之條例無非欲軍之盛。爲國家億萬年
根本計。而稽之衛所。至不及。祖宗時額數之半。臣
愚欲乞今日行。所以安爲軍者之道焉。臣聞唐陸贄
論鎮守之兵。又曰。非物理所愜。不寧。非人情所欲。不
固。論選置鎮守之兵。又曰。必量其性習。辦其土宜。而
總之以便于人情之一語。今天下爲軍者。北人而南
南人而北。使其族姻永棄。齋費不前。僵顛于不可極
之途。而浣瘵于已至之域。豈便于人情者哉。是以軍

戶被清如剝膚。軍丁被解如棄市。原籍苟可埋沒。違恤其他衛所。苟可在亡。無虞厥後。律示免死。而人懷等死之心。榜求報効。而人不動自効之念也。然則陸贄便于人情之一語。其安爲軍者之道乎。今日所以安爲軍者之道。卽贄之謂量其性習。辨其土宜。是已合無該部計議。轉行各處清軍御史。督同各該清軍官員。將所屬府州縣軍戶。通對伍項文冊。清出軍丁。係缺伍失勾。及先年清出在官。遠方不曾到衛者。清理有次。造冊繳部。略訪弘治三年題准。改編事例。將

兩直隸十三省所屬府州縣區其衛所南北于南北
仍各度其遠近南北近遠既定則查筭其清出軍丁
之數與之兌換使南解補南北解補北近及五百里
遠止二千里此收則彼分豁彼收則此分豁行今天
下衛所分豁之後不許再勾則密理能寒者不失胡
貉疏理能暑者不違揚越風塵免其艱難水土易于
諸服逃者將自行首官居者將樂然就役矣豈憂額
數之不復乎彼各處問刑衙門所有問發人犯定擬
衛分雖罪應發極邊亦宜分其南北俱拘連當房家

苦多端道遠共一耳

答解之

小隨住斯不過遠以累長行押送人役而本犯不致
逃故行伍亦得其助若曰罪戾不遠無以儆衆庶當
在選赦不輕原也軍豈復借于招募乎軍戶所已清
出軍丁戶有不願行者此似不可行令其戶當二軍于本處或鄰

近衛所註籍食糧差操其戶餘丁照例優免彼安土
重遷宜多有之是亦足兵之法也臣此議皆便于人
情以安爲軍者之道倘賜施行天下軍民幸甚臣之
所得于道路者此六事其中亦有急于時者故終言
之願陛下終聽之焉陛下聽斷誠果任委誠公

群臣將皆慙慙自劾于陛下、聽斷任委之中、所與所革、將萬萬于此矣、此臣所以果聽斷公任委爲陛下勸也。

鹽法疏

鹽法

臣過靈州花馬池、得聞二池之鹽、自來不費人力煎熬、夏秋晴暖、水面皚皚如雪、如霜隨取隨足、而今課仍舊額、傷于狹矣、又鞏昌府漳西二縣、亦有鹽池、額課、御史王愷要發洮河岷州折銀易馬、其河西鎮番衛鎮夷所有鹽池、而無額課、除鎮夷鹽法、該驛公用

外鎮番境內外鹽池數多，獨無可資于官者乎。臣懇乞勅賜一清，卽其已効，廣爲永圖。前項鹽池，若是計引重煩，不如增額爲便。卽行計量近年給引之數，斟酌時中之額，于兩場乾潦之間，制多寡贏縮之節。大約可增二十萬引。引鹽既定，可計課銀。每一百引得銀二十五兩，不問客商土著。納銀二十五兩者，得引百道。課銀一年，當不下二三萬兩。如遇各邊缺馬，給發買補，鞏昌鎮番地方鹽池，應否照此定奪。其餘河階狄道魚河等處土鹽小鹽，各加禁約，不許興販。致

壞課程敢有權門勢族撓越依律治罪庶國用益充
邊軍可無缺馬也

省營繕以光治道疏

省營繕

臣切見近日司禮監節傳奉 聖旨蓋造乾清宮西
七所并添修萬歲山後毓秀亭該各衙門措辦物料
雇覓工匠摘撥團營做工官軍者臣自開命寸衷若
驚端居以思中夜而歎 陛下卽位以來節儉形于
宮闈仁恩遍于寰宇積之于心施之于政無非爲國
愛民而數年之間土木頻興若神樂觀等五處迄今

尙在做工，宮西七所固難免于蓋造，山後毓秀亭可
以不復添修，今乃前工未訖，後工踵之，此作未成，彼
作復繼，費府庫之財，疲軍民之力，恐與 陛下初政
愛民之心，不相類也。臣謹昧死而冒言焉。命下踰月
矣，臣未見有爲 陛下言者，意者 陛下銳于所爲
言必得罪人，故自危不敢言耶。何宜言而久不言也。
雖然，臣知此之宜言而自同緘默，是自欺也。臣歷觀
載籍，前代人君，未有不惜民力，好厯土功而克善其
治者。民之所以勞，財之所以傷，國本之所以易搖，國

用之所以不給致之雖非一端而土功實甚聖帝明君故必謹焉。恭緩急時酌應否非不得已不輕以爲而其爲之必皆出于爲民。如大禹之溝洫文王之臺沼始下無所病而上安其利。王制用民之力歲不過三日又視歲之所入以定役數。凶札之歲則無力役新阡之治則無征役于役民之中。寓愛民之仁如此。今天下所在差遣如翬毛貧孤靡遺而大者荆建王府供餉軍需元元之瘵難以縷數耳目之所不及臣不舉以恩天聽也。京師比年土木之功豈盡同于古

之役民者乎。叅時酌事，豈皆甚不得已者乎。漢書載文帝嘗欲作露臺，召匠計之，直百金。曰：百金中人十家之產。吾奉先帝宮室，嘗恐羞之，何以臺爲。文帝之時，海內富庶，都鄙廩庾皆滿，而府庫餘貲財。且惜百金，中人十家之產，則他所用肯復妄費有如此者乎。奉先帝宮室，嘗恐羞之，則凡規制一定之外，肯復有所克拓而侈于舊乎。漢文爲後世嗣統守成之令主，蓋以是也。陛下志欲齊軌禹文，顧不念漢文帝之言耶。且今之時，視文帝之富庶，何如矣。國家無事百

三十年于茲，豐亨豫大之運，宜非漢比，而閭閻之下，愁歎之聲，窘戚之態，殊不稱于盛世。臣觀漢文帝在位，賜天下民租之半者，再除之而不收者，十餘年，當時豈無一切用度，國有餘蓄故耳。陛下視今之內帑儲峙，果誠有餘，何不間歲示天下以免租之詔，使天下曉然知陛下愛民之心，歡感生育，遂油雲霽雨之望于苗穡之日之爲大哉，而必取盈舉諸筭權之利以供工作，臣未睹今日之有餘蓄也。陛下試計今日工作，奚翅百倍露臺之費也，二處物料，七所

之所寄放。及該監之所收貯。一有不敷。不免索之于外。索之于外。則工部不免那移。順天等府不免科派。盧溝橋張家灣等處局廠應用者。曾不能補料之半。柱礎等石。皆要開塘起取。瑠璃素白磚瓦。亦要設窑燒造。凡百所需。無不擾擾。在內者。以一糜二。在外者。以十供一。如顏料中石大青大綠。皆每斤值銀數兩。所用無慮數萬斤。銀亦無慮數十萬兩。木石等匠。除在官人外。雇覓該三百名。每名一日工價七分。一日即該銀二十一兩。略約一年工價。已費七千餘兩矣。

二語悉一役之半

陛下方春時和。不爲販貸之議。奈何有用之財。棄之
不急之務。有限之入。蕩于無藝之支。無漢文帝之富
庶。而所爲過之。無乃不可乎。京營官軍。統之以二。而
簡之以十二。所以肘腋宸居。股肱郡輔。潛蓄精銳。專
備倉卒調遣者也。其半外衛四都司。春秋兩班。按期
輪替。卽漢南北軍。而兼乎番上。唐左右衛兵。而併其
府衛。以居重馭輕。從中制外。我祖宗之貽謀存焉。
非土木之功。所當役也。臣揆之制軍民二役。分自後
代。成周役民之法。有爲五兩卒旅者。兵之役也。今之

興役之失尚小。役京軍之失甚大。極論之是也。

比閩族黨州鄉之中。朋戶抽下。卽專役于兵矣。而復不免于他作。不失之重役乎。邇年神樂觀等五處。做工官軍有八千者。有五千者。少亦不下二千。二大營已撥去一萬七千。團營撥去五千。備更番者又該五千。工程浩繁。有一二年者。有二三年者。助輒再閱寒暑。在京土著之家。稍有生理。逐月雇工等項。用銀至一兩餘。外衛而無業者。則行糧糶盡。答應不前。自度難支。多行遠竄。心畏罪罰。不返本衛。亦往往有之。夫人情孰不欲骨肉相保。鄉井相聚。而以行役別其父

毋妻子。差戍拋其田廬屋產。不可憫乎。今二處做工團營。又該撥去九千。通計更番。卽一萬八千之數。緣絲見喘。勢殆未已。竭澤得魚。後將何繼。且臣聞之。各處管工官員。大較假公濟私。便遷延以規利。務隱射以求閒。工程不急催完。軍士致荒訓練。在營聽操者。無幾何矣。營中之弊。殷實私于辦納。精壯私于跟隨。技藝私于造作。教場操點。暫令應名。號令甫畢。四散而去。稽其數目。莫竟所止。由做工有以爲推托之地也。虜使祇今入朝。本營人馬。送迎擺列。已告不足。萬

一意外之虞突如叵測。欲一呼十萬容可得乎。此臣之所爲國家根本慮也。雖然臣聞之道路之言。又有當爲 陛下告者。外間嗾傳 陛下添修毓秀亭而盛厨廡。叢臺榭。將以極遊觀也。 陛下早朝晏罷。勵精圖治。清燕之間。寧有他念。我 大祖高皇帝。皇明祖訓。遊翫去處。更不許造。今乃及此。殆爲 祖宗之舊。不忍就墮。而人言大謬者。生于疑耳。見影疑形。聞響疑聲。疑之所在。未全無以言之所生。亦必有爲輦轂之下。衆口沸喧。傳之四方。訛且益甚矣。仰惟我

太祖皇帝沉机先略，創制定規，佑啓後人，纖悉畢具。洪武八年，建大內宮殿，詔有司不事華麗，曰：使吾子孫後世守以爲法。又曰：游觀之所，朕決不爲。嘗指宮中隙地，謂皇太子諸王曰：此非不可起亭館臺榭。今但令內使種蔬，蓋以一人治天下，不以天下奉一人。恐奢侈之易萌，而宴安之易溺也。陛下允執厥中，監于成憲，游觀二字，臣奚復容臆揣，而外間得于彷彿之迹，終莫釋然。臣愚故爲陛下惜也。欲人勿疑，莫若勿爲。陛下能如祖訓所戒，于疑何足置。

嗚宋英宗朝有請于汴河築堤者趙抃謂民多不欲
奏已其事築堤以防患而民不欲尚爲之已今日之
工作異築堤者多矣我太祖龍興初自宣至徽有
儒士來見問曰鄧愈築城百姓怨否曰頗怨卽命罷
之築城以衛民因民頗怨而遂罷之今日之工作異
築城者多矣陛下安能保民之皆欲而無怨耶無
怪乎有是言也是言殆近于謗然畏謗而悔過非
陛下之聖不能也月令工師之命無或作爲淫巧以
蕩上心特重言之一器物之淫巧而上心乘之以蕩

况所以蕩上心有大焉者是誠不可不慎也君之心
權與乎天下之安危休戚者也慎持之則財不肯輕
費力不肯輕役歛于民也薄動于民也簡不慎持之
則反是而天下之安危休戚分焉此常理也 陛下
之聖臣知無他念矣彷彿之迹猶願 陛下去之七
所制度所當有流秀亭事理所可緩 陛下儻察臣
言于此忝酌而弛其一凡物料工匠官軍盡得減半
則慶幸在 朝廷當何如禔福在生齒當何如而外
間之所疑亦自釋矣如或亭已拆動則可加補葺不

增一楹使完而已。古者宮室塗而不珉，摩而不刻，人君之孝，固在謹守。祖宗之法之訓，而豈在侈土木于前觀哉。陛下幸加早斷，毋以事集而難已也。唐貞觀初，太宗謂公卿曰：朕欲營一殿，材用已具，鑿秦而止是也。毋惡臣言之戇而難受也。貞觀四年，太宗發卒修洛陽宮，張玄素切諫，比之煬帝。太宗爲罷役是也。臣以陛下之聖，必不罪言者，故敢進此愚忠。未諳事體，甘觸諱忌，草茅耿耿，自不能已。惟陛下少垂察焉。

皇明經世文編卷之終